

厓官表奏卷第九

廬陵周益國文忠公集一百三十

邑後學歐陽棨介卿重刊

淳熙十六年

辭免少保劄子

臣伏覩制書特授臣少保進封益國公加食邑食實封者殊私
曲被駭汗交流臣聞賞當其功謂之慶授非其人謂之僭邇者
壽皇聖帝親以大寶傳授聖明當行慶施惠之初夷夏傾耳以
聽號令臣於斯時誤尸宰事所宜協贊陛下愛惜名器修明紀
綱豈容身自僥踰或愆於義况孤保之任專待勲德前後輔臣
得此者鮮而乃首揚大庭之號加臣非分之寵本欲行慶反近

借賞其爲初政之累也大矣臣今未敢奉行制命蓋將必冀寢
免若謂溥博之恩徧及臣庶不使微臣獨未霑被則臣固嘗面
奏乞許回授私心公論庶皆合宜伏望聖慈特賜矜允干犯天
威臣無任兢惶懇切之至

不允詔

昔舜以天下禪禹精一執中之旨旣心傳而面命之矣又擇
益稷之賢置諸左右輔相其治授受之美於是爲至惟我壽
皇實用此道將以神器昇於冲人故首擢卿居上相之位卿
親逢盛時密贊大計肆朕纘紹凡厥政事悉所仰成茂勲如
此晉位亞保疏封大國其於寵褒未爲過也往其祇命毋事

遜辭

辭免表

臣伏蒙聖慈以臣辭免特授少保益國公加食邑食實封特降
詔書不允者該輔無功際九五御天之始疏榮有命居二三執
政之先方備控於忱詞已隨頒於溫詔明知踰分敢避瀆尊竊
惟左赫之聯時乃面槐之貳周官立訓資兩儀寅亮之功漢志
垂讓任萬乘燕私之責歷代久忘於古誼政和初定於宏規必
酌勲德之隆或待親賢之茂上匪虛授下難冒居如臣者稟資
迂愚遭世休顯大言則望大利每愧事君小才不離小官自甘
累日詎期頻歲連陟崇階會逢離照之明更下巽申之命式是

百辟久不稱於儀圖茲惟三孤顧豈用於官備伏望皇帝陛下
道無私覆明以公生謹旌褒者當在政初抑僥倖者必由貴始
特回誤寵姑許貶恩既免累於清朝亦獲安於素守臣無任云
云

不允批答

省表具之壽皇不以朕非德使承大統既擢卿上台屬以輔
朕在廷翊戴之勲未有先於卿者矣進班孤棘實按著令而
卿執深確引義固辭使朕崇報之意慊然不安於中在卿則
爲高在朕則爲薄矧當初政令出惟行旣以告廷豈容反汗
卿宜爲國情之其卽欽承無廢休命

再辭免表

臣伏蒙聖慈以臣上表辭免特授少保益國公加食邑食實封
恩命特降中使賜臣批答不允者悃悞之言踵詔音而上瀆丁
宜之訓勤勅賜以來宜凜危慮之未安控堅辭而弗已竊以龍
飛之慶溥及華夷蠢動之微咸雷雨露幸叨居於輔佐例覃被
於光榮倘大義之罔愆在小廉而可畧惟今亞保乃昔司空有
德者不必真除况臣無彌諧之德有勞者未嘗序進况臣無翊
戴之勞直緣會遇於一時遂假寵靈於三少自猶知其弗稱人
豈謂之當然蓋取非其分則災身而與過其宜則累國是敢懇
懇前旒之側且將切切累牘之中期道滿盈少逃譴責何上紆

於宸眷復申戒於汝諧施重邱山懼深淵谷伏望皇帝陛下持
爵馭其臣之要稽賞延於世之文許以貴名馳之賤息如是則
恩從隗始已無廢於舊章民具尹瞻亦免于於新政臣之幸也
天必從之臣無任云云

不允批答

省表具之孤棘之任專待勲德而不可序進卿言是矣夫以
命世之賢贊親傳之策厥今勲德孰有如卿者乎况輔弼之
臣遭逢內禪稽諸舊典例進兩秩今自文階之冠升亞保之
聯纔一等耳朕方以未足酌卿為歉而卿懇辭不已顧欲馳
恩毋乃執謙之過乎宜體至意勿復有請

再辭免劄子

臣猥以凡才久事陛下於東宮今值君臨萬邦又得備位宰輔
其為榮華殆非衆比覃霈所加臣何敢固辭惟是三孤重任與
尋常遷轉不同非親非賢非有大功未始輕升臣寔何人乃敢
當此若謂恩由近始理難獨遺臣固已屢奏乞許回授倘蒙陛
下曲從所請則是國之大慶非不霑被而止制命告廷人皆知
陛下待臣禮意甚寵今者自緣揣分量才再三控避陛下不得
已而聽之在臣居之則安於國又免僭賞其為大賜奚啻一官
而已臣已再上表辭免進具劄子申敘懇款必冀天慈卽賜俞
允臣無任惶懼俟命之至伏取進止

不允詔

朕於卽政之始凡厥命令未嘗不謹而後出矧登進孤保褒寵台輔茲事體大顧豈輕易而發哉命出惟行誠難反汗而卿執謙不已是未喻朕意也至若馳恩子姓必無官可進然後用此卿爵秩雖崇未云極品援以爲說則又非宜其亟欽承毋稽成命所請宜不允

第三辭劄子

臣比蒙聖慈以覃恩特授少保雖名一官然與他文階不同屢嘗面奏及於辭免奏表劄中具言只乞許臣回授兩奉詔書疊勤批答且宣諭再三未賜俞允臣感激兢懼無地措躬以理揆

之終非所據况畱正元轉兩官力辭其一臣若冒受公議謂何仰冀聖明允臣所乞至於進封加食邑更不敢固辭乞令學士院貼麻施行伏取進止

不允詔

朕於股肱大臣無所不致其厚矧國朝以來位特進而爵亞保者止是次遷初非躡等况卿羽翼朕於東宮弼諧朕之初政功德之茂誰復如卿參稽典章稍陟位序未盡褒崇之禮寔虞冒受之嫌遜辭沓來殊拂朕意亟宜祇受毋使人議朕於報功而薄也所辭宜不允

第四辭劄子

臣此月九日面奏乞以轉少保一官許令回授恭聆宣諭謂成命已行不必多辭臣繼具劄子陳述又蒙降詔不允惟聖恩隆厚度越常格非臣糜捐所能報稱自當祇承德意豈敢固執不移但臣正月間轉廳日已自增秩三等僅及月餘復此峻遷非獨在臣私義難安實恐名器輕假仰累初政此臣所以益用煩瀆獲譴不敢自恕而但已也伏望天慈特賜矜許止加封邑貼麻行下臣意迫辭窮無任戰栗俟命之至取進止

辭免冊命劄子

臣比值覃恩進陞孤保懇辭六七面命再三雖已欽承實深祇懼惟是冊拜未嘗舉行仰祈聖明許賜寢免冒瀆宸極臣無任

惶懼俟命之至取進止

允譯

朕始嗣寶曆褒崇輔臣考圖按爵秩卿亞保方詔有司卜良日序繙紳於位列金石於庭備物典冊親臨軒而授之所以明貴貴也而卿處榮弗矜援比丐免顧忱誠之有素在謙德以榮光茲用勉從益深嘉尚所辭宜允

乞序位在嘉王之下劄子

臣等伏見漢制諸侯王在丞相之上本朝太平興國八年十一月雖詔改定位序當時宰相宋琪等固辭其後治平元年六月韓琦等亦嘗表請立班穎王之下蓋欲復古制也今者皇子嘉

王封拜云初而臣等資望既非宋琪之比禮華琦輩又無能為
役倘仍舊貫實不皇宜欲乞序班在皇子之下庶幾稍協古誼
如蒙聖慈俯從所請即批附閣門施行取進止

御批皇子嘉王某官品自有定制班位當在宰輔之下所請
宜不允

謝除少保表

臣周某言伏奉制命授臣少保益國公加食邑食實封累具辭
免伏蒙聖慈特降中使賜臣批答不允仍斷來章者天開禹績
親承厥數之傳德愧尹躬叨被保衡之拜控辭弗獲祇受為慚
臣某中謝竊維祖宗之盛時多卿相之舊德勲業光於簡冊聲

名重於朝廷正惟爵位之高允謂事功之稱如臣不肖敢企前
修曾微一善之稱偶際三朝之盛麟臺憲府蚤蒙高廟之親除
鳴陛給閣嘗侍壽皇之初政晚被中台之數再逢內禪之期首
告大廷超加異渥念覃霈自近司而始稽舊章無回授之文跼
躄拜嘉愧就列茲蓋伏遇皇帝陛下乾飛有作離照無疆憐
臣昔備宮僚久承恩獎謂臣今居宰席密佐聖明特厚寵華式
昭榮遇統百官而均四海已知任職之難日三孤而弼一人常
究名官之義未知報塞徒誓糜捐臣無任云云

謝重華宮表

臣周某言伏奉制命授臣少保益國公加食邑食實封者執舜

禹之中涓敷大慶申皋夔之命首沐鴻私拜賜兢營省躬戰栗
臣某中謝伏念臣猥由孤賤獲際盛明辭州縣之徒勞備師儒
之遴選當紹興末綴臺諫之清班暨內禪初預禁嚴之密侍寅
緣簡擢敷歷高華戴恩憐則山岳爲輕課績效則絲毫奚有旋
叨大任遂陟冢司惟三聖相承曠萬年而幾見顧老臣何幸閱
一世而再逢數貞元朝士之無多念魯國靈光之獨在是容躡
等有愧踰涯茲蓋伏遇至尊壽皇聖帝陛下盛德難名成功不
處父有天下得神聖以親傳王居域中與乾坤而同大眷茲駑
鈍被以龍光况臣輔政十年受知最厚名官三少在列所稀旣
未能退避於賢才又不獲日親於闕燕惟勉殫於臣節期力贊

入君仁寵聖之思諄諄於是臣無任云云

辭免講堂轉官回授劄子

臣伏蒙聖慈以臣曾任東宮講堂官依三月十七日指揮轉兩
官許回授者伏念臣頃聯禁從獲侍承華恩遇最隆畧無補報
今位階下龍飛九五潤澤萬方與念舊僚許以延賞是謂非常
之幸曾不世之異恩但臣備位宰司叨塵已厚可以無取豈容
傷廉欲望聖慈特寢成命庶於分義或可少安干犯天威臣無
任戰栗俟命之至

不允詔

卿昔以淵源之學導朕於承華今以經濟之才佐朕之初政

功既各異賞宜屢加特俾馳恩曾非過寵尙茲固遜殊弗至
懷亟膺延世之休益盡教忠之誼所辭宜不允

辭免轉官公據劄子

臣今準省劄緣吏部以臣曾兼太子詹事具在東宮講堂官項
目內例轉兩官許回授臣卽隨衆具奏辭免伏蒙聖慈降詔不
允欲再陳乞聞今日吏部已給到公據一道臣竊思講堂官專
爲曾講經讀史之人臣昨來止是備員詹事其於講讀未嘗宜
勞難以一體祇受此理甚明欲望特降睿旨許臣繳納上件公
據庶協於理伏取進止

不允詔

朕念羽翼之舊勲厚股肱之殊眷勉狗辭官之請故加賜予
之恩已抑朕懷曲成卿美雖謙言之再至顧大義以難從宜
卽欽承勿庸屢遜所辭宜不允不得再有陳請

辭免親饗禮儀使支賜劄子

臣昨者伏覩親饗太廟都太主管所奏審支賜銀絹數內禮儀
使三節次各支七十疋兩臣嘗面奏無功受賜乞行請免已荷
天恩曲從所請卽已貼去今準結絕所傳奉聖旨依舊齋到賜
目寔不皇安欲望聖慈依已得指揮許免祇受干犯宸嚴臣無
任戰懼之至取進止

奉御批不須多
辭可特收受

乞去劄子

臣輒傾丹悃上瀆宸嚴臣以至愚極陋之資遭時遇主致位二府月征日邁遂閱十年方爲疑丞循默隨衆已負素餐之罪暨升次輔彌覺技窮爰自去冬懇祈罷免恭值壽皇聖帝將舉內禪未容遽去亦嘗奏知祇俟三數月間覆申前請粵自陛下乘乾出震睿智日躋正藉宰司奉承教令俾羣臣宿道向方於內萬民一新耳目於外然後治功可致聖德有光今臣乃以衰疲庸謬之人玩歲愒月妨礙賢路仰辜陛下大有爲之志公議藉藉久矣臣雖欲自恕其可得乎今幸親饗訖事使命成禮量能引分允也其時伏望陛下念邦棟之非輕察凡才之無用因其自列許奉外祠庶於去留之闡明示意旨自然人心奮勵立懦

廉頑初政急務孰大於此觸冒天威臣無任戰灼俟命之至取進止

乞去奏狀

右臣今早於榻前控敘危懇乞解機政願就外祠非敢卒然有言遂欲輕去軒陛實緣揣分量才旣難任重又當陛下政令維新久妨賢路恐誤國事所以決爲退休之計伏蒙聖諭諄諄未賜矜許一日之間三勤宣押前無此例臣惶懼感激自當仰承威命屈勉就職但以輔臣舉措寔繫國體倏去忽留近於要君一致人言萬死莫贖欲望聖慈特回宸慮早賜俞允臣以表章不得通輒附中使恭述謝悃且致再三之瀆臣來日亦未敢赴

朝參不免家居俟命臣無任虔祈激切之至謹錄奏聞伏候勅旨

御批卿久輔慈皇茂紆賢業茲求新政之益實賴舊弼之臣遽上謙章曷副眷意

再乞去劄子

臣昨具奏陳乞解罷機政伏蒙聖慈四遣中使宣押仍賜親批備形嘉獎眷畱之意者伏以迫切之辭願還相印丁寧之誥特錫宸章隆禮貌以有加過囊封而莫達恭趨法座浣布危衷臣聞立政之初用人爲本以明而陟當隆赫赫之瞻有過則懲敢作容容之計矧在官僚之首合知進退之方伏念臣本乏才能

可庸任使徒緣際會遂忝彌諧逡巡歲月之多積累愆尤之衆應酬庶務豈能事事以協宜甄敘羣才安得人人而盡善動常招於指目居每畏於譏評抱此兢慚凜於朝夕憶壽皇之初政倚康伯之舊臣曾未幾時猶辭大任矧微臣之無似豈前此之可忘雖復少畱迄將何補懼妨賢而誤國非避事以謀身伏望皇帝陛下奮勵剛明照知情實旣顯周邦之新命更憐秦府之舊人如公器之傍牛與天閑之駑馬久經服御今已衰疲姑全刀匕之餘生任適山林之野性茲惟大惠敬俟俞音干犯天威臣無任激切俟命之至取進止

再乞去奏狀

臣屢披丹悃求解政機聖恩隆厚眷畱備至臣固應仰體殊遇不當堅執愚見緣臣自計甚審宜去非一奏陳之際拙訥未能盡宣須至海濱天聽臣聞祖宗時輔相二三年間必須補外蓋權重則嫌謗易生位高則責望尤衆今臣執政首尾八載宅揆已踰二年績效無聞罪戾日積臣宜去一也酌酢機務全在精力臣六十之年又過其四平時多病近者尤甚日所食米纔二三合時當盛夏猶服冬裘衰疾如此臣宜去二也資性懦弱無經濟之才語言輕易非廊廟之具自叨大任衆論弗與街談巷議雜然譏之縉紳公言亦可想見臣宜去三也聖明御極日新庶政易置輔臣古今常理壽皇初載陳康伯尙不敢久畱而况

臣乎蚤蒙聖諭謂康伯求去月日不如是之速蓋是時康伯獨相又有人望所以稍緩今右揆賢德中外具瞻而臣望實不孚每招議論幸親饗訖事使命成禮正當策免已備列於初奏臣宜去四也今春蒙壽皇曲畱嘗奏知勉強數月輔陛下之初政卽避賢路今當踐言難復故位臣宜去五也凡此五者並非飾詞何待臣言難逃聖鑒惟有二事亦合詳奏臣備數東宮閱歲滋久旣陛下諄諄以爲論在臣豈無戀主之心然而當軸處中非恃恩之地尸祿素餐或致彈劾陛下雖欲不加譴斥如公議何孰若因其有請保全終始以重國體此一事也其一事則自右遷左賜位特進實爲僥倖但以條例當然不敢獨辭未幾陛

下登極首叨覃轉遂冒孤棘又緣累朝故事此恩無終辭之理不免汗顏祇受今若奉身而退則名器豈容虛假倘蒙聖恩幸許其去只乞以元官奉祠猶可少弭人言粗安分義臣之肝膽盡於此矣伏望天慈早賜處分施行謹錄奏聞伏候勅旨

辭免除職判潭州劄子

臣近疊具奏乞罷政奉祠今聞已降制命除臣觀文殿大學士判潭州臣誠惶誠恐罔知所措竊惟秘殿隆名長沙鉅鎮兼舉以授必惟其人如臣者任職居官碌碌無補迫於衰病仍懼滿盈引分丐閑良非獲已敢謂陛下曲全體貌眷撫有加纔兩日間宣押再四惟茲異數近古所稀今又加職典藩寵榮其去在

聖主禮意則厚矣恩德則深矣愚臣自揣其何敢當所慮招致煩言仰辜鴻造伏望聖慈收還成命止授外祠庶令進退之間不失辭受之義干犯宸扆臣無任戰慄俟命之至伏取進止

不允詔

朕過待股肱優隆體貌既懇辭於重任必寵賁以徽章匪惟答其輔贊之勞亦以光其進退之節卿朕之舊學國之元臣四近周旋宣勤踰於十載兩朝授受策勲茂於一時茲解繁機爰加異數進延恩之秘職專帥闡於上游庸便乃私且榮其去亟膺渙渥宜畧謙撝所辭宜不允

再辭表

臣某言近具奏辭免新除觀文殿大學士判潭州恩命伏蒙聖
慈特降詔書不允者保全其去已銜莫大之恩寵賁其行敢望
甚優之禮雖溫言之俯暨終危慮之難安伏念臣本乏寸長叨
聯近彌當聖主初承於不緒審愚臣絕企於清光懼干誤國之
誅亟上乞身之請陛下厚黃闈之深眷記青宮之舊僚畱臣非
不堅待臣非不至其如內愆私義外畏公言縱欲強顏抑將何
補茲用數塵於淵聽庶幾俯鑒於精誠方當覆餗之凶詎意觸
藩之吉伏蒙皇帝陛下仁心恤隱聖度包荒拔之險陷之途置
之安寧之地其爲感德固已淪肌至於通籍殿中分麾闈外極
輔臣之異數須元老之壯猷猥被妄庸定貽顛沛願勅還於前

詔幸姑畀以外祠身在江湖縱復去天之遠忠存畎畝猶有報
上之心重此陳辭期於必遂臣無任云云

同日奏劄

臣今年正月壽皇聖帝欲移御重華宮委臣討論典禮面許錫
賚昨日蒙差使臣齎賜酒器二百兩并清馥薰衣香共五十貼
新茶兩種臣不敢辭免卽已祇受本應朝辭日敷奏今旣聞言
官論列恐未必得望清光合具奏知仰乞睿照

重華宮奏劄

臣迂疎鴛下積緣幸會一自壽皇聖帝陛下初臨大寶卽蒙擢
侍螭坊由是封值任使徧歷華近以至二府天地之恩莫可量

度正使碎首捐軀安能圖報萬一近者陛下決策內禪凡百典禮盡出睿謨臣偶備宰司預聞意旨初無一語可助討論今緣輔政非才乞解政機兩朝大恩未酬毫髮非敢潔身而去實緣衆論不容恐洊至煩言有傷國體姑欲自爲去就豈謂聖慈記向來欲加錫賚之語親御翰墨申昇異數位方金器御府香茶皆非微臣之所當得君賜之重不敢輒辭惟當退夸里閭以侈榮遇傳之子孫世世報德臣見今辭免新命俟三數日間朝辭面奏皇帝乞詣宮謝辭尙望矜念大馬舊臣許賜宣引臣無任瞻天荷聖感激惶懼之至

乞以元官奉祠并免謝辭劄子

臣已具奏辭免加職典藩見在城外恭候威命尙有誠悃須至奏陳臣乃者備位輔臣適緣幸會值陛下倣臨大寶叨冒覃轉進位亞保臣固嘗懇辭六七曲蒙聖訓丁寔必令祇受臣亦檢照累朝典故惟此非常異恩宰司無回授之例雖已承命每不自安今旣得請罷政乞還此官於理無歉欲望聖慈祇令以舊秩奉祠庶安愚分所有謝辭一節緣臣罪戾至多深恐言者攻擊未已必疑臣朝辭之口妄有陳述仰感聖聽臣將無以自明愈重其罪伏乞并賜處分施行取進止

奉御批免朝辭在外宮觀任便居住

謝除醴泉觀使表

臣某言伏奉勅命差臣充醴泉觀使在外任便居住臣已望闕

道謝訖者用踰其分宜佛民瞻詔許之歸尙均祠秩恩與天而
同大感無地以寄言臣某 中謝 伏念臣以妄人生逢昭代不自
量其才力乃過竊於寵榮久合投閒夙嘗控請屬飛龍之聖作
時不歸心雖老馬之力疲詎忘戀主少需三月方敢一言悞蒙
英睿之知優假弼諧之禮玉人疊至親札下頒凡可示於留行
已畢全於故實逮清議弗容之際猶隆施未替於初所愧冥頑
仰辜化育茲蓋伏遇皇帝陛下待人以恕馭下惟公念臣早侍
元良深致保全之意知臣自遺衆怒難專子奪之私聽辭湘水
之麾俾領祥源之使摧髮不足以數愚臣之罪捐軀不足以酬
聖主之仁惟憑香火之緣上祝乾坤之算臣無任

重明節開啟疏

天祐聖神方啓萬年之祚人輸頌禱敬歸兩足之尊矧誕節之
肇臨宜勝因之多祐皇帝陛下伏願功高文命養備重華中國
有至人舉梯航而畢集西方無量壽極算數以難名臣無任

重明節進功德疏右語

天開昌運時誕聖君嘉節倣逢輿情胥忭披三旬之釋典祝萬
壽之堯年皇帝陛下伏願道冠百王功成一統河沙可數大福
無窮麻象易推修齡難測施及華夷之衆同躋仁壽之期臣無
任

重明節賀表

臣某言伏以嵩呼萬歲俶臨萬宇之朝日近重陽肇立重明之節邦家大慶夷夏同歡臣某中賀恭惟皇帝陛下德冠古初仁周品彙將旦而羣陰伏寢以明昌得秋而萬寶成俾茲熾大自今伊始有億斯年臣久沐洪恩驟違丹陛夢尋園綺猶進旅以陳篇日斷夔龍阻隨班而上壽第堅請祝實倍常均臣無任

重華宮會慶節功德疏右語

伏以積二十七祀之仁恩民誰不被享億萬斯年之鴻算理有必然茲因誕節之臨更效封人之祝伏願與天無極如日常中金母長生永對慈闈之養玉卮稱壽坐觀聖王之朝臣無任

重華宮會慶節賀表

伏以寒裳高蹈仰黃屋之非心繞電載臨效華封而祝聖雖曰雲天之遠居然葵藿之依臣某中賀恭維至尊壽皇聖帝陛下御下以仁事親惟孝委成功而弗處玩至道以自怡九重備養而儉德愈彰太極彌尊而謙光滋著昔君一或得此尙爲有道之長今我兼而行之宜享無疆之壽臣屏居外郡欣際昌辰望東內以馳情指南山而申頌臣無任

冬至節賀表

臣某言伏以七日之來禮方隆於亞歲萬年之祝時正紀於初元居然有截之區同此無疆之頌臣某中賀恭維皇帝陛下得天之統如日之常治格豐年何待占雲之邈人安化國自應測

景之長陽德方亨聖圖益廣臣奉祠迹遠望闕心勞雖歌舞之
無階在葵傾而敢怠臣無任云云

歷官表奏卷九終

歷官表奏卷第十

廬陵周益國文忠公集一百三十一

邑後學歐陽棨介卿重刊

紹熙元年

年節賀表

臣某言伏以陽遇三而成泰時謂人正聖以一而為元肇新歲
紀羣方來賀庶物皆春臣某中賀恭惟皇帝陛下以德施仁順
時布_始始印之政應天地之發生寬大之書協祖宗之溫厚明
繼明而方永朔復朔以奚窮臣驟遠獸樽俎更鳳_麻夢想臚傳
之禮阻陪特揖之班徒竭寸誠仰祈萬壽臣無任

重明節祥符寺開啟疏

電繞紫樞啟真人之震夙經緇紺字集妙果之莊嚴是資彌月之勤庸効後天之祝皇帝陛下伏願壽隆無量福極難名轉聖王之四輪咸依天覆歷賢劫之千佛牙保君臨

重明節天慶觀開啟疏

帝圖有永逢上聖之膺期道力無邊紆下情而致禱集琳宮之淨侶慶甲觀之昌辰皇帝陛下伏願如日照臨體天覆壽考越萬年之久子孫開千億之繁夏清冬溫永奉北宮之養丁躔丙度常占南極之祥

重明節進功德疏右語

祝聖人者三華封尙爾俾眉壽之萬魯史猶然矧嘗密侍於清

光茲幸親逢於誕節罄丹衷之切至斷鴻算之延長皇帝陛下伏願如佛獨尊與天同大三千爾眾咸歸有道之邦億兆斯民共洽無爲之化丕隆親養彌永皇圖

重明節賀表

臣某言恭遇九月四日重明節者伏以卿雲彌館統夙開三日之祥瑞露承囊載紀千秋之節兩宮胥慶羣辟交欣臣某中賀恭惟皇帝陛下保合太和綏寧中夏修文偃武運天地之仁心神薄斂省刑傳祖宗之家法積此無窮之澤儲爲有羨之休齊久照於羲舒邁永年於箕翼臣早塵附鳳今際流虹屏迹江湖第遙瞻於太紫精心香火竊自比於緇黃

重華宮會慶節進功德疏右語

天錫慈皇之壽以莫不增民懷聖父之仁其何能已虔敷秘典仰贊昌辰至尊壽皇聖帝陛下伏願以無為之化不冒羣生以不宰之功常居太極列真千佛共儲有羨之齡諸夏百蠻永效無疆之頌

重華宮會慶節賀表

紫禁高居受宣親之至養赤光下照標誕聖之初期凡在含生舉深善頌臣某中賀恭惟至尊壽皇聖帝陛下仁明毓德揖遜成功瑞芝符壽母之祥寶婺肇曾孫之慶載臨令節丕洽宸歡寬旋初奉於瑤卮方蕙萬年之盛郡國俶均於鎬宴益彰二紀

之謙臣身也奉祠心焉存闕徒因彌月之旦申詠後天之詞臣無任

冬至節賀表

臣某言伏以剛為天德既反則亨陽主歲功其來為復適觀道長胥慶君臨臣某中賀恭惟皇帝陛下圖大宅中順時布政仰占乾度會七曜於太初俯應人和合八能於前殿無疆之祝有截所同臣名玷內祠身縻寒谷企望堯雲之遠欣逢舜日之長臣無任

辭免判隆興府劄子

臣今月二十日準尚書省劄子十月二十七日三省同奉聖旨

周某可判隆興府免奏事疾速之任臣聞命震恐無地措躬伏
念臣庸愚不肖本非可用之才而冒恩最久深叨榮最受任至重不能悉
心竭力徒知竊位素餐釋往月來舉戾山積向非陛下念其簪
履之舊力賜全存則臣螻蟻微生當膏鈇質豈容尚尸厚祿安
處故里日夜慙懼無以仰副天地父母之隆施今者特蒙拔過
昇以藩方恩旨一臨如蹈淵谷深惟上流重地選用匪輕如臣
負罪嬰譴加之素有病氣之疾年齡遲暮浸以昏忘驟臨民社
必速顛隲思量力自言非敢備禮伏望睿慈俯矜誠悃亟收前詔
上以全聖主始終之賜下以免微臣冒昧之誅未泯餘生別圖
報効固無任虔祈激切戰栗俟命之至取進止

貼黃

臣重念豫章督府難久闕守緣臣聞命辭免已越累旬決無官
受之理欲乞便賜俞允免致再瀆威尊有妨謀帥臣不勝幸願

十二月十一日
御批降詔不允

不允詔 倪思撰

勅某云云具悉遠稽周室之庸賢有若召公之爲保明南國
之教所以宣德澤而旁流分西陝之權所以強形勢而內輔
乃今謀帥視昔同符求諸九棘之班付以十連之寄謂宜卽
日以之鎮尙且抗章而力辭惟時价藩難久闕守其稟已行
之命亟慰來暮之思所辭宜不允

紹熙二年

年節賀表

臣某言伏以七政旋觀爰接龍杓之宿二儀交泰重領象魏之
 春闈闔天開紳綬星拱臣某中賀恭惟皇帝陛下懋昭聖治推
 廣仁心百姓羣黎均被發生之德五戎六狄咸依覆冒之恩受
 福無疆降年有永臣久茲伏隩邈矣造庭但同皞皞之民共樂
 熙熙之化臣無任

再辭免判隆興府第二劄子

臣近具奏辭免判隆興府恩命正月二日恭奉十二月十二日
 詔書所辭宜不允者臣稽首祇拜以還感極至於流涕自當欽

承威命即日啟塗庶因蕃宣圖報萬一實緣臣衰年抱疾力不
 能勝是敢罄竭腹心游于淵聽伏念臣奮身鉛槧本無才能受
 爵不避遂至超踰粵自投閒以來追思平昔生叨竊過分毫髮無
 補常疑天刑人禍不可幸免迨聞起鎮將恐將懼心氣宿疾自
 此轉甚而又寒入腰脊步履艱窘飲食減少日就羸瘠稽留詔
 書無地措躬假令扶憊赴官以兢憂之心彊疲懦之質凡所施
 設決至差謬上流重鎮豈容養病何待旬月定干大戾在臣既
 乖不能者止之誼又使一邦徒費將迎其罪愈不勝誅矣臣亦
 仰揆聖意或以臣嘗侍左右誤被簡知不欲使之久間特昇鄉
 部以示光寵是陛下施惠於臣者至深至厚苟非心勦形瘵如

前所陳則臣何敢固為辭避抵冒嚴譴伏望聖慈深賜矜察即
降又分許臣仍舊奉祠脫之進退惶迫之中置之保全安佚之
地此為恩德胡可勝陳臣報首捐軀尚期異日贖犯天威固無任
戰栗俟命之至取進止

允詔 倪思撰

勅某云云具悉入居輔弼出任蕃宣大臣之職也卿上相印
而奉祠節再更歲齋朕念其久閒起鎮鄉部恩遇之渥謂即
欽承抗章控陳却而復至情辭懇切弗從得乎勉徇雅懷不
忘眷注所辭宜允

繳勅書銀合臘藥狀

右某昨準進奏院遞到勅書一道賜銀合臘藥係是前宰執判
隆興府江西安撫使恩數緣當時辭免恩命未敢祇受已權寄
吉州軍資庫今來已奉詔書所辭宜允謹具狀申尚書省乞賜
敷奏將上件勅書銀合臘藥赴所屬繳納伏候指揮

重明節進功德疏右語

右伏以天錫明君丕享萬齡之算人歸聖德咸輸三祝之誠假
梵釋之薰修助海山之深峻皇帝陛下伏願自疆法乾之健久
照如離之明重譯效於貢珍兩宮隆於榮養域中而王居一執
道紀以長生天下而我獨尊等佛身之無量

重明節賀表

大火德炎是生與至重陽節適載紀誕辰罄夷夏以來同與乾坤而等久臣某中賀恭惟皇帝陛下道齊堯舜功邁禹湯發於言者罔匪仁言施於政者無非仁政是以兵寢刑措編氓舉安時和歲豐生齒日衆積億兆人之就望宜萬千歲以熾昌臣攀附有初禱祈滋切容光日照雖悵於戴盆所欲天從竊同於窺管臣無任

重華宮會慶節進功德疏右語

名伏以燃無盡之燈允符久照按長生之籙敬卜後天凡戴德之斯民舉竭誠於是日至尊壽皇聖帝陛下伏願鴻基益固睿算彌增三面網開何取唐宮之獻大元筴授永觀漢殿之卮

重華宮會慶節賀表

日會析津夙推良月星流華渚茲應昌期凡居有截之區同罄無疆之祝臣某中賀恭惟至尊壽皇聖帝陛下功成弗處道大難名不獨親其親孝與慈而並廣爲衆父之父理暨性以兼融巍然太極之尊永矣溥天之養聖謨可頌睿算難窮臣竊伏江城欣逢誕節望重華之殿旅百何從想萬歲之山呼三罔怠臣無任

辭免除觀文殿學士判潭州劄子

臣九月六日準省劄八月十一日三省同奉聖旨周某可除觀文殿學士判潭州龍光狎至榮懼交深臣仰惟秘殿之職有三

紫宸居首大藩之名不一南楚爲雄惟譽望素高者許綴其班
惟恩威兼著者始堪其任如臣抱虛竊寵浮實起羞進無可施
之能退有未補之過獨荷聖心之簡記每紆皇眷以慈憐方辭
鄉部之麾又畀鄰封之帥更聯禁直加賁頽齡顧私心猶不自
安在公論必難衆允伏望陛下垂矜舊物深鑒危衷曲全終始
之恩特寢便蕃之命間官厚祿願樂於聖時異數名邦免妨於
賢路所有除命臣未敢祇受冒瀆天聽臣無任云云取進止

奉御

筆批降
不允詔 李獻撰

勅某云云具悉朕崇咨舊輔寵遇碩儒秘殿隆名所以增華

於賢望南邦雄鎮所以倚重於英猷卿夙秉機衡久安館圉
茲藩垣之申命尙函牘於懇辭夫臣嘗作於股肱何靳四方
之宣力且治已均於邦國奚難九牧之阜民矧如洪化之訏
謨式稱延恩之優禮諠無可避令在必行往亟體於淵懷庸
勉圖於美績所辭宜不允

再辭免劄子

臣近具奏辭免新除觀文殿學士判潭州恩命伏奉九月二十
日詔書所辭宜不允者聖恩天大負荷已難詔旨春溫競榮滋
劇伏念臣以百無所堪之才而久竊甚高之位以萬分未報之
德而更受非常之知苟可効勤殺身奚憚今者畀之美職付以

名藩任使優隆豈應辭避緣臣去冬特膺宸眷起鎮豫章自度無方面之才有心氣之疾物情未與顛沛是虞壘控忱誠願安閒散迄蒙從欲賜以保全僅歷三時復頒異數隆恩加厚衆或無他然臣揣分量才自當知止况始終忝竊既殊先迷後得之義而衰病侵陵又非昔疾今愈之時倘冒寵光必貽罪戾伏望陛下察臣行能之無取憐臣筋力之既憊不以名器假非其人

不以藩翰授非其任收還誤渥改命實才未隕餘生必期稱塞臣無任云云取進止

奉御筆批
降詔不允

不允詔 倪思撰

勅某云云具悉卿上相印之初朕固嘗寵以紫宸峻職畀之

南楚帥權矣維今之除蓋申前命既本朕之始意無復人之間言比覽遜章已詳諭旨謂開藩之云久何引道之尚淹且卿昔力辭猶為有說茲焉固避是乃過謙勉煩寅亮之賢往重方維之望亟其之鎮宜止控陳所辭宜不允不得再有陳請

三辭免劄子

臣近兩具奏辭免觀文殿學士判潭州恩命疊蒙聖慈降詔不允不得再有陳請者臣自惟犬馬餘生何以當天地曲成之造如此蓋陛下記臣頃因罷政嘗有是除俯眷舊人迄申前詔臣既合仰體德意又長沙關守已涉累月今來更不敢辭避見一

而起發之任惟是殿帷列職近臣高選方茲起廢異乎勸功况
臣祿秩已優足假寵以臨民吏豈應更冒殊渥自招延滿溢之災
欲望皇聖明照臣悃悞特頒睿旨姑寢除職之命俟他時治郡不
至瘵曠然後賜以褒陟則公朝予之為有名微臣受之為有說
免令非據或致疾顛屢瀆天威臣無任震懼所懇之至伏取進
止十一月十四日三省同奉聖旨
依已降詔不允不得更有陳請

冬至節賀表

敬奉天時順周正而發政躬修郊報即漢時以陳儀喜浹華夷
恩漸動植臣某中賀恭惟皇帝陛下懋昭仁孝獨運聖神百姓
德教之加灼知聖治萬邦豐年之屢永底農功履陽復之昌辰

天子齊之曼壽臣久違班列屬剖藩符第同富庶之民共樂舒
長之景

郊祀禮成賀表

臣某言恭惟聞郊祀大禮慶成者三歲親祠雖存彝制一純自薦
尤在初郊倚大典之告成紛羣方之來賀臣某中賀臣聞中和
立極然後禮樂可以格神德政養民然後粢盛可以事帝是為
中外之相應豈特儀容之可觀恭惟皇帝陛下躬堯舜之仁懋
禹湯之儉省刑以彰王化薄斂而裕民生肆迎景至之長丕闡
國南之祀歸功高廟預殫尊祖之誠獻胙慈庭亟展事親之孝
情文交舉古昔罕聞臣祇赴侯藩欣逢邦慶端闡肆皆班莫綴

於朝紳宣室受釐夢徒遊於帝座臣無任

潭州謝上表

臣某言先準告命除臣觀文殿學士判潭州已於十一月二十日到任交割職事訖者除音中出兼內朝外闈之榮詔旨下頒趣新組舊封之拜戴洪私之浩蕩即便道以馳驅俶見吏民敬宜德意臣某中謝伏念臣初微一善獲事三朝高廟疑其有小才儲之臺閣壽皇察其無大過試以鈞衡會宸極之天臨念宮僚之歲久弼予新政咨汝舊人而力不逮於初心望不孚於衆聽懇辭鼎軸隨困風波蒙全度之深憐竊優閒之厚祿桑榆景逼惟甘嬰疾於清漳葵藿心傾未忍掛冠於神虎詎期軫記頻

唐章姓名復齒於殿帷委寄仍還於湘部謂昔之銷印重違白筆之公言故今者剖符明示清衷之本意踦類雁門之復夢成鹿野之真載揆衰殘若為稱塞茲蓋伏遇皇帝陛下用人由已篤舊惟仁吉庚巽命之申晝日康侯之錫餅畧雖溢猶施挹注之功牛馬已疲尚備服乘之數臣敢不思酌睿獎勉布寬條豈能待三年而有成或庶幾一日之必葺在前智畧悵往謬之難追治郡功名期後圖之允懋臣無任

郊祀謝赦表

臣某言準都進奏院遞到赦書一道為郊祀禮畢大赦天下臣即時集本州官吏軍民望闕謝恩宣示施行訖者肇禋三歲丕

昭莫大之儀肆肯萬方誕布惟新之澤若民與吏式舞且歌臣
 某中謝臣聞好生者上之所先多辟者下或不免堯舜衣冠之
 畫教猶弼以五刑成康囹圄之空法亦施於三宥於皇昭代尤
 廣惠心率於大祀之竣隨以龐恩之施恭惟皇帝陛下精誠內
 罄法度外彰欽崇郊廟之文丕冒華夷之眾福其錫汝敷皇極
 於箕疇過曰在予富善人於周賚惟道以德故有恥可格惟協
 於中故無刑可期臣久侍威顏灼知聖意甫效駑才於方岳適
 逢鴻禧於園丘誓殫宣布之勤仰副緝熙之美臣無任

郊祀禮成謝加食邑表

臣某言伏奉制命以郊祀禮成加臣食邑一千戶食實封四百

戶分土武安阻侍壇垓之饗宣麻文德首叨并地之加省已無
 勞拜恩有覲臣某中謝伏念臣奮由羈賤積冒寵榮氓受一厘
 本為於織席侯封萬戶乃極於布衣茲逢祭澤之行更衍封租
 之人此蓋伏遇皇帝陛下事天寅畏馭下寬仁覃誠意於初郊
 均神休於率土雖在江湖之遠亦頒綸綍之新承惠長沙敬想
 孝文之問稱忠甲令敢馳吳越之賢臣無任

高宗加上謚號賀重華宮表

臣某言伏覲都進奏院報十一月二十四日加上高宗受命中
 興全功至德聖神武文昭仁憲孝皇帝徽號冊寶禮成者肇講
 郊禋追崇祖德垂鴻億世底豫三宮凡在照臨惟胥鼓舞臣某

中賀 臣嘗博稽盛帝疇若高宗異時德壽之宮屢增榮號今日
顧成之廟益薦徽名恭惟至尊壽皇聖帝陛下捐遜功高顯揚
志切庥數命禹坐觀子述之明羹牆見堯居致時思之孝茲邦
儀之告備宜聖意之允諧臣分土攸拘班庭莫遂迭傳盛典馳
驚寸心臣無任

○ 賀皇帝表

臣某言伏覩都進奏院報十一月二十四日加上高宗受命中
興全功至德聖神武文昭仁憲孝皇帝徽號冊寶禮成者我祖
萬邦之君名已昭於太室先庚三日之吉號復衍於初郊縉禮
時成含生風動臣某 中賀 高宗皇帝受天明命享國永年解三

萬言難盡放勲之稽古加十六字將同藝祖之開基恭惟皇帝
陛下寅紹邦圖顯揚世烈合華夷之公願闡古今之彌文涓休
假廟之前具嚴典冊展慶受釐之後底豫神人臣祇役蕃宣逢
辰昌盛莫預鋪張之列惟思希曠之儀臣無任

賜銀合臘藥勅書

保思撰

勅某卿國鈞舊秉帥閫新臨當凝凜之屆期宜冲和之加衛
俾頒珍劑庸示眷懷今賜卿銀合臘藥至可領也故茲示諭
想宜知悉冬寒卿比好否遣書指不多及

○ 謝表

臣某言準都進奏院遞到勅書一道賜臣銀合臘藥臣已望闕

遙謝祇受訖者雲章封璽寶劑實奩適屬凝嚴頓蘇疲瘵臣某
中謝伏念臣甫從閒散起備蕃宣雖恪守於官箴曾未除於民
瘼豈圖宸渥爰舉邦彝詔塗芝檢之黃光於下澤藥按桐君之
錄滋以上池手披出綉之溫心矢折綿之凜此蓋伏遇皇帝陛
下慈憐臣庶軫念藩維已施起廢之功更廣蠲痾之賜恩勤至
矣報稱謂何臣謹當因六尚之珍良察一方之疾苦乃身無恙
敢獨享於君仁所部有瘳期咸霑於聖惠臣無任

賜紹熙三年麻日宣

太史局進納到紹熙三年麻日今賜潭州守臣

右宣令潭州守臣準此

紹熙二年十一月二十四日

謝表

臣某言準都進奏院遞到宣一道賜臣紹熙三年麻日一卷已
望闕謝恩祇受訖者閏月定四時爰及三年之閏春秋大一統
是頒萬國之春稽首窺文悉心布治臣某中謝恭惟皇帝陛下
璣衡齊政麻數在躬歲更始以專農明昭先務王求端而得正
誕著新書將令志慮之孚豈獨典常之舉若時宣化屬在守封
臣敢不仰體聖心俯勤民事天監厥德方屢格於豐登天心張本作
職思其憂當益加於勸課臣無任

紹熙三年

年節賀表

臣某言伏以元會葳儀仗入龍樓之曉孟陬占象厥新鳳紀之
編夷夏來同堪輿協慶臣某中賀恭惟皇帝陛下乘乾之健出
震而亨孝備愛欽濟三宮之和氣書頒寬大轉四海之仁風於
萬斯年自今以始臣久違班著俶布藩條春見日朝徒想北辰
之拱閨餘成歲敢稽東作之平臣無任

問聖體劄子

臣恭聞去臘之初皇帝陛下暫親藥餌隨喜康和既獲助於天
人宜駢臻於祉福臣身縻符竹夢想闕庭望天日之光莫陪朝
列見羽旄之美更想都人謹具手劄起居以聞伏乞睿照

賀御殿劄子

臣比者恭聞皇帝陛下庸理之間節宣微爽神明所相今已痊
平日御延和裁決萬務無疆之慶有截同歡臣伏限守郡在遠
不獲躡舞闕庭臣無任

辭免復觀文殿大學士劄子

臣竊覩進奏院報已降制命復臣觀文殿大學士者恩光滋厚
愧恐兼深伏念臣頃去周行嘗叨峻職審僉諧之弗契因懇避
以獲從逮起鎮於藩方併通班於殿陛超踰已甚褒陟則那載
惟有道之朝詎假無名之寵謂臣偶經郊霈則已疏千戶之封
謂臣忝佩郡章則未奉三年之計反復敢當於大號初終盍守

於小廉伏望皇帝陛下重爵秩以勸功謹器名而馭下念昔者
本非宜得在今茲何以復還鑒多懼之危衷收再頒之渙渥身
聯禁籍尚奚假於升華名洗刑書難更膺於進律所有復職思
命臣未敢祇受謹事爾返施展臣無任兢惶俟命之至取進止

不允詔 李燾撰

勅某省所奏劄子辭免復觀文殿大學士恩命事具悉朕聽
懷元老寵遇鴻儒任重帥藩方懋股肱之力班崇書殿益昭
體貌之恩卿學與器宏望環實茂因釋秉鈞之勤游膺宅牧
之求惟紫宸肇創於隆名在皇祐本優於舊相矧貳公夙建
蓋華職之兼崇而明旨久頒偶遜章之曲徇茲申成渙夏協

人言當祇服於顯徽尚奚煩於撝挹所辭宜不允故茲詔示
想宜知悉夏熟卿比平安好否遣書指不多及

辭免復觀文殿大學士表

臣某言近蒙聖恩復臣觀文殿大學士尋具奏辭免準進奏院
遞到詔書一道所辭宜不允者恩隆申命加一字之袞袞禮重
馭臣下十行之璽札將力回於誤寵敢遽止於牢辭臣某中謝以文
殿大名儒紳異數他學士皆為隔品在朝廷方且虛員孰謂畸
人獨叨睿獎伏念臣積塵美仕久負殊知尸祿素餐在宿愆而
莫益收民御衆曾來效之木仲寵靈驟降於叢霄震懼實深於
丹臆雖君制命而臣承命當即拜於絲綸然天虧盈而神害盈

合海殫於悃悞伏望陛下力持公道俯頌下參考私情收渙渥於已行

免疾顛於非據在微臣日曠瘵之或追則盛時勉勵之有名恭布

忱言伏須允報臣無任云云奉御筆批降詔不允不得再有陳請

不允詔 李獻撰

勅某云云具悉冠榮祕幄蓋乎中外之瞻優寵舊鈞尤係重

輕之體卿以真儒之學濟上賢之才藩閫雖分心固存於廊

廟謀猷益著眷宜厚於臣工茲繇華職之升屢覽冲章之至

謙德之柄在雅志以甚高名實之賓豈公朝之敢廢其承深

詔勿復牢辭所辭宜不允

再謝表

臣某言伏奉制命復臣觀文殿大學士尋疊具辭免特蒙聖慈

再降詔書不允不得再有陳請臣已望闕謝恩祇受訖者紫蓋

分麾甘後循良之吏青規進直猥先侍從之官既假寵於藩維

亦增華於中謝綬臣某伏念臣始塵科級即造英躔舟每至

於蓬瀛光仍依於月晚逢新政深眷舊僚寬策免之常恩昇

詔除之異數雖自勉僅二年之久而簡蒙兩命之加假征鎮

之申權還殿庭之右職進之犬雞之効顏方劇於汗顏可存雨

露之邊地彌高於清切紛盛世賢猷之衆獨微臣榮遇之多遜

避弗俞兢慙罔措茲蓋伏遇皇帝陛下天臨萬寓子視羣工我

澤如春思湛恩之汪濊爾身在外憐復玷之難難命靡憚於重

申賞無嫌於盜僭臣敢不欽承鴻渥益厲素心三省昨非當力圖於今是再叨大受滋有愧於小知普殫宣布之勞仰報初終之賜臣無任

賜銀合夏藥勅書

勅某卿望重舊鈞任隆巨屏茲屆炎歊之盛方宜勞勩之多其錫珍良以昭眷顧今賜卿銀合夏藥至可領也故茲示諭想宜知悉夏熱卿比好否遣書指不多及

謝表

臣某言準都進奏院遞到勅書一道賜臣銀合夏藥臣已望闕遙謝祇受訖者日長星火軫侯國之災曠言出絲綸頒方丞之

珍劑仁深扇暘恩釋負茲臣某

申謝

伏念臣自遠雲龍之庭常

憂狗馬之疾比承詔獎來布藩條風雨晦明第謹天時之順參苓桂朮實慙藥籠之須窺綠字以欣榮啓寶匱而兢懼茲蓋伏遇皇帝陛下哲臻煥若怨息暑咨方申命義叔之時眷南巡衡山之境靡忘加惠庸賁守封臣敢不推廣上心勤求民隱與魏君之五色允有光輝稽周典之十全庶無疾札臣無任

降郡公謝表

臣某言伏奉制命以臣舉常良孫改官犯入已賊降榮陽郡開國公臣已望闕謝恩祇受訖者舉廉而濁如泥分甘嚴譴擇士而削以地恩畀寬科目垣制以兢慙手桓圭而戰栗臣某

申謝

伏念臣幸緣復職例許薦員知公朝改秩之嚴乃忘體國知聖
至去貪之切乃昧表民况嘗尸南曹典選之官且久預東府掄
材之數衆方責備理合益求全用門閥以取人孰云盜壁近闕庭
而試吏何至攫金厥既伏辜自應連坐雖國除而郡降居二品
之中然爵賜其鄉猶在諸侯之上戴包荒之大德懷撻市之深
羞茲蓋伏遇皇帝陛下提挈四維抑揚百辟賞受上者每丕勸
於進賢刑無小焉宜必懲於故犯聊從薄責將使厚顏臣敢不
循省誓尤圖惟報效職由獄吏已示貶於延年命錫郤卿尙踰
功於白季臣無任

重明節進功德疏右語

右伏以誕彌厥月昭電繞以虹流於萬斯年頌天長而地久載
緡玉笈之字有衍赤精之符皇帝陛下伏願順慶垂基惟皇作
極永錫難老爲上古之大椿申命用休增泰元之神筴臣無任

會慶節進功德疏右語

右伏以宜君皇皇高脫屣於萬乘爲衆父父垂錄鑑於千秋大
集殊因丕延多歷至尊壽皇聖帝陛下伏願文齡有永舜壽無
疆駘太史之書老人常見於南極誦宣尼之語衆星長拱於北
辰臣無任

會慶節進銀奏狀

伏以萬年億載之歡載臨誕節四海九州之養咸備慈庭叨預

守封敢稽報上前件物坤珍所效邦賦攸資瑞溢商山知利源之不竭貢輸衡嶽符壽祉之彌堅所有銀一千兩謹隨狀上進
言瀆宸嚴臣無任

冬至節賀表

臣某言伏以雷居復地日在巽維應周統以得天戴魏儀而亞歲臣某中賀恭惟皇帝陛下剛明顯著仁愛敷施七日閉關心法乾坤之施八荒開域壽同夷夏之躋茂履昌期駢臻純嘏臣身縻方郡迹遠嚴宸徒瞻迎送之雲共樂舒長之景臣無任

丐祠劄子

臣輒瀝愚誠仰干睿聽伏念臣猥以凡才荷陛下簡知特異圖非一日乃者輔政無狀引分丐閒衆言交擊罪在不測獨賴天地覆載委曲保全寘諸安閒之地閱時未幾紀錄有加美職名藩舉以授之臣感激恩遇所以圖報謂當如何捐軀委命且非所愛承流宣化固宜自勉而臣性資懦弱不習吏事規模淺陋短於御衆加以素有惛眩之疾發作無時年垂七十精力衰耗曠戾日增深惟長沙地控湖廣統縣十二自昔戶口爲諸路之冠中興以來生聚涵養已及承平四十餘萬之數使臣不病不老尙非守帥之才矧衰疾如尤甚劇上所陳者乎然臣前日不敢固辭冒昧一來者正以陛下親加擢用恩意隆厚臣子之誼所當欽承也適有天幸憑藉聖化竊祿彌歲偶未底於放逐於今年至病

侵技窮力竭宜去不去私心固難自安其在公論將不容恕伏望聖慈俯矜危懼賜以祠祿特護其所短免於大戾重貽晚節之羞亦冀捨劇就閒專事醫藥或少延於暮齒矢心報塞沒世乃已臣無任虔祈瀝懇之至取進止

奉御筆批
降詔不允

不允詔

倪思撰

勅某云云具悉長沙地控湖廣戶口為諸路冠信如卿之言帥守之任必藉重臣卿開藩彌年教明南國朕實嘉賴之引疾丐祠良所未喻且卿每上章奏詞翰精確年少者所弗及足以驗神觀之不衰矣其體眷懷勉留鎮撫所請宜不允

賜銀合臘藥勅書

勅某卿為時元老作鎮重湖履冬序之嚴寒賜珍奩之良劑具承眷顧益衛冲和今賜卿銀合臘藥至可領也故茲示諭想宜知悉冬寒卿比好否遣書指不多及

謝表

良藥分珍申錫堯言之煖衰年被寵顧忘楚塞之寒恩厚莫量感深曷報臣某中謝伏念臣一切屏翰再值嘉平乏宣布之小勤積曠瘵之大懼屬當移病未許投閒封泥壘於玉堂以時而授乞刀圭於金鼎何恙弗除豈曰彝章實為異數茲蓋伏遇皇帝陛下博施仁政優待藩方頒綸綍之光華融雪霜之凜冽慈憐若此稱塞謂何時無札瘥幸同仁壽之域職在綏撫願奏和

安之書臣無任

謝賜紹熙四年麻日表

歲運無窮。裁成密度。王春有椒。誕告庶邦。吏拜賜以承流。民知時而趨事。臣某中謝恭惟皇帝陛下。道參覆載。職備羲和。天畏棊忱。式九圍而順帝。星隆晷德。齊七政以授人。凡叨守土之官。咸起競辰之志。臣敢不宣頌詔壘。勸勉農疇。在麻數於舜躬。孰能推步暨朔南之禹。教尙覲混同。臣無任

歷官表奏卷十終

歷官表奏卷第十一

廬陵周益國文忠公集一百三十二

邑後學歐陽棨介卿重刊

紹熙四年

年節賀表

伏以歲華有倣。天德又新。凡依覆冒之仁。均被發生之澤。臣某中賀恭惟皇帝陛下。至明御極。大度包荒。啟祚延長。行萬年之麻數。推恩溥博。轉四海之春風。一聆狗鐸之音。舉遂登臺之樂。臣奉藩職。屢存闕心。勞誓恪布於竟。書期共陶於聖。化臣無任誕皇孫賀重華宮表

有天下而傳之子。初微黃屋之心。受帝祉而施于孫。椒誕青宮

之胄慶均五殿喜浹萬邦臣某中賀臣聞瓊幹分暉率由於本

固銀潢演潤蓋自於源深際今日之蕃昌乃異時之積累世世

修德則儲有羨之休親親仁民則享無窮之樂盛哉豐報備此

燕居恭惟至尊壽皇聖帝陛下道極際蟠心遊冲淡綿本支於

百世延壽考於萬年仙李盤根笑唐基之未大猗蘭奕葉掩漢

事而有光臣幸值邦榮屬分闕寄南宮北內想胥洽於宸歡左

城右平悵莫陪於班賀臣無任

○ 賀皇帝表

天佑下民君萬年而錫祚地居上嗣震一索而得男宗社靈長

華夷呼舞臣某中賀臣歷觀在昔執擬斯今守一道以親傳冠

百王而聖作當內外泰亨之日且春秋鼎盛之時仰奉重親四

海九州之養俯臨甲觀三宮五殿之歡洽此榮懷光於簡冊恭

惟皇帝陛下仁心溥博德教敷施赫赫炎炎克篤無疆之烈繩

繩揖揖適符有道之長是開千億之祥奚止眾多之慶臣夙叨

睿獎彌極懽悰天占人而人占天已驗同和之理子有孫而孫

有子載賡蕃衍之章臣無任

○ 乞宮祠奏三月上

臣輒披肝膽上瀆冕旒臣去年十月嘗具奏乞宮觀差遣伏蒙

聖旨特降詔書不允臣仰戴天地大恩未知稱塞深欲勉扶衰

憊究心民事圖報萬一今又半載矣身既益老病亦隨加素苦

痰眩發作無時內則心神恍惚觸事廢忘外則目力昏痛不能省閱其於職業曠弛已甚蓋臣犬馬之年指日七十平時精力已自弗強矧當暮景固應如此特以貪戀君恩不敢便乞休致若抱疴治郡遷延不去豈惟羞對民吏定須招致人言負聖主保全之恩乖微臣進退之義此則臣所大懼也欲望聖慈特降睿旨許臣亟奉外祠歸安田里休養身心少待年歲乃伸掛冠之請庶粗合於禮經瀝懇籲天必期矜允臣無任

第二劄子

臣比於三月間緣年近七十久苦痰眩心神恍惚觸事廢忘兼之目力昏耗有妨省閱簿書嘗具奏陳乞祠祿迄今未奉俞旨

爰自四月下旬以來復得欬嗽之疾百藥俱試未見其效目今飲食日減委實不能支吾深惟郡事浩繁非尸祿養病之地欲望聖慈檢會前奏特降睿旨授臣在外宮觀差遣使得一意醫藥保全餘生覆載之恩朝夕以冀干冒天威臣無任

賜銀合夏藥勅書

倪思撰

勅某卿望隆孤棘任重帥藩屬炎暑之維時宜珍調之有助錫之靈劑實以寶奩尙體眷懷深加攝養今賜卿銀合夏藥至可領也故茲示諭想宜知悉夏熱卿比好否遣書指不多及

謝表

殿閣生涼念遐方之炎熱置郵傳命將厚賜以流行施重邱山
光生民吏臣某中謝伏念臣猥叨殊遇久典名邦愠解南薰值
虞琴之德洽病多東海慙黯閣之治稱有來中詔之頒申界尙
方之錫蠲疴攸賴馭幸何功茲蓋伏遇皇帝陛下道合乾坤禮
優藩翰深處九重之禁每懷萬國之臣穆如清風幸竊窺於宸
指慰彼黎庶願益廣於君仁臣無任

謝復益國公表

八月

華陽黑水裂地而封舊物青氈從天而下磨玷之勤未著執珪
之寵彌加臣某中謝臣聞冬而次之以春爰兆好生之意剝而
受之以復可稽序卦之文蓋天心貴德而緩刑宜聖主推仁而

發政臣之竊位眾所共譏取三百塵之禾封租已厚連四手石
之重職業殊隳自干舉枉之誅方抱臨深之懼乃容暮叙不待
赦原茲蓋伏遇皇帝陛下御眾以寬忘人之過俾爾四海識包
涵之度豈於一夫遺甄復之恩逢辰則然思報曷已而臣迫於
告老何自圖新獲一吉人莫助舜功之大用三有俊但歌湯聖
之躋臣無任

重明節進功德疏右語

右伏以乾元用九節瀕重九之期萬歲呼三時契登三之治雖
歌詠辭之啓矣在禱祈理亦宜之皇帝陛下伏願聖日常明堯
天廣覆西佛之壽無量豈惟千劫之多北辰之居不移宜爾眾

星之拱臣無任

乞宮祠奏狀 九月二十七日

右臣輒瀝悃悰仰干睿聽伏念臣夙蒙獎擢度越常倫起鎮名藩首尾三涉冬序常願竭犬馬之力以圖報於萬一而臣稟賦素弱病不離身年垂七十衰瘁彌甚春夏間恭控辭請尙闕俞音尋得痰嗽之疾療治未愈腹病繼作藥石雜進如水投石外雖勉強蒞事而精神昏憤職業曠弛隱之方寸揆之筋力若非亟投閒散悉意保調豈特招致人言必將自速蹙踣投誠君父一語敢欺伏望陛下恢廣鴻私眷憐舊物特與宮觀差遣使之養疴田里涵泳聖澤餘生未泯尙期酬天地之恩臣無任

十月十三日

日 上十六日奉 御批降詔不允

不允詔 十月十七日

勅某省所奏乞特與宮觀差遣事具悉卿以相臣宿望作牧湘楚郡政巨細靡不究心於茲三年教明南國夫勞於前者逸於後優游坐嘯務舉大體今其時矣膚膝小疾尋當痊愈丐祠之章胡爲屢却而復至乎其存精神止念慮親藥餌以輔和庸副眷注之意所請宜不允故茲詔示想宜知悉冬寒卿比平安好否遣書指不多及

辭免隆興府奏狀

右臣伏覩進奏院報十一月二十五日三省同奉聖旨周某

判隆興府疾速之任恩意有加由遠而近非臣朽邁所克欽承
敢控忱辭仰干睿聽伏念臣幸逢明聖誤被簡知典領藩維更
歷三臘才駑力弱政拙心勞不勝狗馬之疾願投閒散屬勤詔
諭未賜曲從方且叩閤再有所請忽叨易鎮滋不皇寔蓋地以
潛藩爲重任以鄉部爲寵陛下之眷臣可謂厚矣年至則理當
告老病侵則難於陳力臣之自處謂宜如何若復不自揣量猶
將冒昧旣愆於義實畏人言伏望聖慈深閱衰殘洞照惻愍收
還符竹改異官祠使之養痾里閭粗適分願少需旬月遂乞歸
休天施地生孰大於此緣臣已聞移命難留舊治候省劄到卽
歸本貫吉州恭聽俞旨伏乞早賜處分冒犯宸嚴臣無任

不允詔

倪思撰

勅某省所奏辭免判隆興府疾速之任恩命事具悉卿國之
元老外領帥藩重湖以南蒙福多矣乃頒綸旨易鎮洪都地
望益雄道里爲近第室所寓殆同鄉部有畫繡之輝焉坐嘯
臥護忱所優爲懇辭忽來何冲挹之過亟其勉哉庸體朕意
所辭宜不允故茲詔示想宜知悉春寒卿比平安好否遣書
指不多及

慈福慶壽賀表

慶鍾文母豈惟八十年聖女之興禮歲湯孫更祝萬億載天休
之敬三宮和氣四海歡聲臣某

中賀

臣聞奉親者家國至榮况

重親之在上慶壽者古今罕覩矧高壽之未央天丕佑於皇朝
時兼崇於盛典恭惟皇帝陛下仁心廣博聖治昭彰以厥庶民
久矣達大家而教孝于其王母茲焉受介福以及人愜聖父之
慈懷副寰區之公願臣自欣晚節獲值昌辰莫陪特揖之班但
幸殊常之遇其爲抃蹈實倍等倫

賜銀合臘藥勅書

倪思撰

勅某卿寅亮元臣久宣勞於鎮撫嘉平令序屆屬候於嚴凝
靈劑式頒珍調攸助諒朕心之是體俾民瘼之有瘳今賜卿
銀合臘藥至可領也故茲示諭想宜知悉冬寒卿比好丕遣
書指不多及

謝表

天無私覆外懷五王之臣帝有恩言中錫萬金之劑凜乎歲晚
倏爾春回臣某中謝伏念臣罪被綸書起司符竹考湘纍之九
辯闕楚戶之三霜多病所須常求藥物十全爲上未造醫師茲
逢漢宮臘飲之時乃冒唐殿銀罌之澤茲益伏遇皇帝陛下道
遵皇極治格泰和惟疾之憂每推父母之愛曰生之德更廣乾
坤之仁故當凝漚之辰時有珍良之賜臣敢不勤於服食稱是
榮恩候屬祁寒深察小民之怨居防美疢載思惡石之生

紹熙五年

再辭判隆興府奏狀

正月二十五日

臣昨奉聖旨判隆興府尋具辭免伏蒙聖恩特降詔書不允仰
銜隆眷俯震危衷尚念公私之間利害非一須至再殫情悚上
瀆聰聽臣竊惟江湖都會事繁地重歲在庚戌嘗叨除授揆才
控免曲荷矜從今齒髮益衰疾患未愈甚非前日之比苟或養
疴竊食何以上寬憂顧此有害於公者也屬聞境內頗罹水旱
幸賴漕臣兼領府事多方措置得以少蘇一旦改易帥守縱欲
恪遵前矩其如才力弗逮首尾未必相應此有害於民者也兼
臣來年七十春月之後自合告老迎新送舊徒費邦財倏來忽
去亦害私義至於田廬姬戚隸其所部雖朝廷有所委任或不
以此爲嫌在於人情終是窒碍臣所以宜觸煩瀆之罪重爲遜

之請蓋權事體輕重有不能自己者爾伏望聖明委照天造
垂憐因此誤恩賦之福祿况監司既已試可何惜就加陟明非
特有利公家抑亦請臣私志竭誠瀝懇天監必昭干冒宸嚴臣
無任二月十一日三省同奉聖旨依所乞差體泉觀使

謝體泉觀使表 二月

臣某言伏奉勅書差臣體泉觀使臣已望闕祇受遙謝訖者分
竹無功懇辭鄉部負茲有疾願備祠官賜報曰俞銜恩以泣臣
某中謝伏念臣早持弱植浸涉榮塗念異時嚴近之班適同甲
賢能之眾今考貞元之朝士僅存下國之靈光藉令齒宿而意
新尚當止足况復老至而耄及自合歸休荷從欲之隆私狗祝

釐之固請此蓋伏遇皇帝陛下恢洪聖度軫惻仁心飽碩鼠於
大倉彰吾廣大秣病駒於中廐待物初終乃眷衰殘不忘惠顧
臣遭逢若此報塞謂何家請官供愧甚千鍾之享天長地久勉
旃萬壽之祈臣無任

重華上仙慰皇帝表

臣某言伏覩大行至尊壽皇聖帝六月九日遺詔者竊以重華
厭世率土傷心臣某誠哀誠痛頓首頓首恭惟皇帝陛下天性
所鍾聖情難處仰祈節抑俯幸臣民臣限以奉祠在遠不獲奔
赴宮庭臣無任屏營摧迫之至

重華上仙慰太皇太后表

皇太后
皇后同

伏以吳穹不弔大行至尊壽皇聖帝奄棄天下之養臣某中慰
恭惟太皇太后殿下遭此變故聖情難居臣限以奉祠在遠不
獲奔赴宮庭臣無任屏營摧迫之至

重華宮功德疏右語

右伏以別宮移御久遺赤水之珠仙馭遐升俄墜橋山之劍假
勝緣之溥博資覺路之逍遙大行至尊壽皇聖帝伏願威神在
天德澤垂後西方世界已自樂於真遊南贍部洲尙密依於陰
陽臣無任

移御壽康宮起居表

臣某言恭惟太上皇帝陛下擇日移御壽康宮者春秋鼎盛思

延安樂之年宵旰倦勤自適清閒之燕凡居覆載咸仰聖明臣
某^{中賀}恭惟太上皇帝陛下德洽民心仁根天性謂中興幾於
六紀而內禪備於兩朝欲慕高風遂頒明詔成康並處而頌聲
作慶越宗周禹啟親傳而謳歌歸事踰有夏臣受恩久矣報德
茫然迷瞻桂殿之華虔祝椿齡之永

皇帝登寶位賀表

臣某言伏觀七月五日詔書皇帝陛下登寶位者上承三宮下
撫萬國天地開泰華夷歡呼臣某^{中賀}恭惟皇帝陛下性稟英
明生知仁孝方居朱邸心已繫於兆民請正青宮奏始踰於千
牘茲臨大寶必底丕平臣久冒國恩坐糜祠廩幸值龍飛之慶

阻陪獸舞之班徒與生靈共深欣戴

重明節開啟疏

伏以春秋鼎盛思延有永之年宵旰倦勤自享無窮之樂載臨
誕月申祝壽期太上皇帝陛下伏願安靜修身沖虛適性千祥
百福備集於聖躬億載萬年永膺於榮養

重明節功德疏右語

右伏以越帝王之高致道固難名亘今古以常存壽何有極載
伸善頌仰贊誕期太上皇帝陛下伏願積聖神不宰之功享清
淨無爲之報後天而老益曼羨於修齡率土之濱永涵濡於盛
德

重明節賀表

臣某言恭遇九月四日重明節者伏以褰裳高蹈仰黃屋之非
 心繞電載臨效華封而祝聖雖曰雲天之遠居然葵藿之傾臣
 某中賀恭惟太上皇帝陛下道大難名功成弗處永矣溥天之
 養巍然太極之尊有道之長方綿延於周麻無疆之壽自跨越
 於莊椿臣也以備宮僚今歸農故奉禱心焉存關徒因彌月之旦申詠後天之詞

瑞慶節開啟疏

伏以十月為陽古稱良月萬年受祐今紀初年恭即淨坊敬繙
 秘典皇帝陛下伏願修齡歲衍厚福日增以台正於四方罔有
 弗服惟天祐於一德馨無不宜

瑞慶節滿散疏

鳳紀編年肇履崇高之位龍宮浴聖旋逢震風之期集彌月之
 善緣祝萬齡之睿算皇帝陛下伏願明齊日月道冒華夷將治
 我家肆復高祖之德維新厥命永底烝民之生

瑞慶節功德疏右語

右伏以星隱夜明周紀佛生之瑞天長地久唐標聖誕之期茲
 際昌辰是伸善頌皇帝陛下伏願明齊日月道冒華夷隆榮養
 於宮庭洽歡聲於海宇威儀而由羣匹既符假樂之詩壽富而
 使多男更協封人之祝

瑞慶節賀表

臣某言伏遇十月十九日瑞慶節者鳳麻編年肇履崇高之位
龍宮浴聖旋逢震夙之期紀節有初呼嵩無斃臣某中賀恭惟
皇帝陛下道繩祖武仁契天心將治我家肆復高祖之德維新
厥命永底烝民之生與國咸休自今以始臣久叨榮祿晚際盛
時阻稱萬壽之觴願獻千秋之鑑

冬至節賀表

臣某言伏以七日之來禮方隆於亞歲萬年之祝時正紀於初
元居然有截之區同此無疆之頌臣某中賀恭惟皇帝陛下得
天之統如日之常歲儉而豐何待占雲之邈人安以樂自應測
景之長陽德加亨聖圖益廣臣奉祠迹遠存闕心勞雖歌舞之

臣某言伏遇十月十九日瑞慶節者鳳麻編年肇履崇高之位

明堂禮成賀表

臣某言恭聞明堂大禮慶成者涓休中辛祇見上帝情文交舉
幽顯來歆臣某中賀臣聞禮莫重於肇禋孝尤嚴於尊祖其在
周室成王祀文王於洛中至於漢朝武帝祠高帝於汶上邇成
熙寧允屬昌時恭惟皇帝陛下執道御今憲天稽古言念九筵
之制適當三歲之秋謂壽皇垂後世之規宜參而用况太上下
先期之詔當述而行果儲有羨之祥永錫無疆之祚臣頃嘗議
禮今阻陪祠嘉與含生共綏霈澤

辭免覃恩轉官奏狀

右臣據本府進奏官姚彥珪報八月二十六日宣制以臣該遇覃恩特轉少傅臣聞命震惶罔知所措義難冒受須至懇辭臣竊惟登極需恩凡文武臣皆許增秩此乃溥天之幸會不繫臣子之功伐列聖已成故實宰執例是轉行往者壽皇聖帝傳位太上皇帝實爲國家大慶又非累朝繼世之比臣於斯時適在政地恩遷一官遂尾三少控免至於入九批詔亦如其數仍蒙兩宮宣諭典故如此非礙正法不當固辭兼陳籛卿帥金陵垂滿二年亦自特進而遷少保臣是以不揣才分既稽舊制又循近比迫於威命靦顏祇受罷政之後言者弗思幸會猶曰無功今陛下受禪云初愛惜名器而臣衰老殘疾待盡田閭飛龍御

云之日不獲陪百執事率舞庭下卽與頃年當軸目視大慶事體殊異倘或冒昧苟貪榮寵人將有詞臣亦無說是敢直披心腹控告君父不復文飾仰瀆聰聽伏望聖慈卽賜寢免以安孤迹以全暮景臣無任

不允詔 直學士院樓鑰撰

勅某省所奏辭免特轉少傅恩命事具悉卿以三朝元老身佩安危退處東山直欲棄置人間事顧豈以爵秩爲心哉朕初臨御注想不忘下詔乞言疏恩進律亦可以見朕意矣覃霽之頒無遠弗届安有達尊如卿而可但已保傅一間不必固辭遜章甚力非朕所望所辭宜不允故茲詔示想宜知悉

秋冷卿比平安好否遣書指不多及

覃恩辭免轉少傅表

臣某言近具奏辭免覃恩除臣少傅恩命伏蒙聖慈特降詔書不允者作君師而相上帝幸際龍飛亮天地而弼一人敢叨鴻霽曲煩溫詔增震危哀臣某中謝臣聞氣回春而萬物生邦有慶而兆民賴惠澤固周於溥率等差宜別於重輕若輔佐居中捧東日於天衢之上或親賢在列拱北辰於霄極之間以此疇庸是云馭貴如臣者身藏畎畝景薄崦嵫掛神武之冠方將有請揚王庭之號豈所當然夫何特揖之官亦在序升之數懼貽清議祕盜丹誠伏望皇帝陛下勉勵人材操持公器雖推恩不

可以不廣而詔爵不可以不嚴已彰均一之仁盍寢優隆之命大辭如慢非晞難退之風小智自私姑道貪夫之誚臣無任

不允詔

樓鑰撰

勅某省所上表再辭免除少傅恩命事具悉朕勉紹丕圖方修初政首推霈澤溥及羣工惟予元老之賢宜陟孤卿之秩偃息而藩魏室何必在廷寅亮而命周官是爲進律載披來奏殊拂眷懷卑於公尊於卿亦惟均耳一而僂再而偃何以多爲茲繫具瞻毋庸固避所辭宜不允不得再有陳請故茲詔示想宜知悉冬寒卿比平安好否遣書指不多及

謝差官賜告奏狀

右臣伏蒙聖慈差閣門官趙嗣祖等賜臣少傅告身者明兩作
離初升杲杲之日王三錫命加賁皇皇之華驚寵數之便蕃聳
榮觀而歆豔雖祈反汗當識謝生伏念臣早冒龍光晚叨燕佚
心猶馳於魏闕夢自隔於鈞天絺冕象車詎意班聯之進簞門
圭竇猥勤摯御之臨固難祇奉於綸章豈易仰當於宸渥此蓋
伏遇皇帝陛下仁先念舊政務作新博致名駒弗遺於老馬兼
收羣植不棄於朽株飭遣輶車寵綏末路孔伋之拜使者已欽
君命之將蔡謨之辭司徒敢忘人臣之禮永言報塞惟誓糜捐
臣除已將告命寄吉州軍資庫伺候回降指揮繳納外臣無任
又手劄

臣妾庸老疾踈伏寒鄉恭值皇帝陛下正位九五不獲進陪多
士瞻望清光幸與庶民均被維新之澤豈謂聖慈曲推異數序
進孤班千里而遙遣使賜告臣雖揣分辭避期於寢免恩施隆
重實踰邱山已別狀奏謝謹復具手劄叙感戴兢懼之萬一附
使者以聞伏乞睿照

再辭免覃轉表

臣某言伏蒙聖慈以臣上表辭免少傅恩命疊降詔書不允不
得再有陳請者乾用九以御天爰下博施之澤巽以重而申命
未俞懇免之章愚固守於不移令必期於惟反臣某誠惶誠恐
頓首頓首伏念臣賦才至薄竊祿已多當內禪之時感以外臣

而幽屏孤執皮帛阻遶於近班言如絲綸誤叨於殊渥既難安於私誼諒曠允於公言敬殫迫切之誠甘觸瀆煩之譴伏望皇帝陛下大明燭隱洪覆包荒察臣兢惶畏避之情恕臣違慢拒違之罪惟笑噸之有爲則廉惠之無傷免以陳人累於新政舜命官而敷教知弗稱於往諧漢受爵以流馳願曲從於回授臣無任

不允詔

樓鑰撰

勅某省所再上表辭免覃恩除少傅恩命事具悉朕嗣膺洪祚注想宗工比陞孤棘之班實需蓼蕭之澤雖云恩厚非曰予私凡卿之言近已行於一二顧朕所與辭何至於再三若

夫賤爵之科尤匪尊賢之意尙承眷渥毋事勞謙所辭宜不允不得再有陳請故茲詔示想宜知悉冬寒卿比平安好否遣書指不多及

乞將覃轉回授奏狀

右臣近三具奏辭免覃恩轉少傅恩命乞許回授伏奉詔書不允不得再有陳請臣竊以三孤班在一品惟親惟賢惟有功乃許序進臣咸無焉徒因非常之慶而得之中外皆謂其不當受豈獨臣不敢受也而辭章三上優詔三下茲乃明主初政遇臣以禮不欲失朝廷之故事又緣臣遠在江西往復經涉時序致勤王人賜告以示光寵廬陵士民共驚創見臣兢營跼蹐雖嘗

望闕稽首拜使者之辱附表陳謝而敬以制書寓諸有司屏息
傾耳恭聽回授之命豈謂聖恩過厚久未報可夫受爵不避詩
人有斯亡之戒臣豈應以垂盡之年自貽伊戚是敢殫竭悃悞
終冀矜允蓋瀆尊有罪君父或不汝疵叨榮非據公論必難情
恕臣於二者知所擇矣伏望聖慈卽賜處分施行臣無任

申尙書省狀

右某昨三具奏辭免覃恩轉少傅恩命三奉詔書不允除別具
奏乞回授外今錄本在前欲望朝廷特賜敷奏卽從所乞以安
愚分謹具申尙書省伏候指揮

謝明堂禮成加恩表

臣某言伏奉制命以明堂大禮慶成加臣食邑一千戶食實封
四百戶者奉廟粟以祠肇稱宗祀開蠶叢之國申衍戶租汪洋
上聖之恩滿溢下臣之分臣某中謝伏念臣自還里閭浸遠闕
廷屬當三歲之期大講九筵之禮阻同列辟儼精佩以趨班殊
異通侯輸酎金而獻廟孰謂制函之下復叨書社之增稽首拜
嘉捫心積愧茲益伏遇皇帝陛下事天寅畏保國寬仁七戒三
齋諱勞何有四海九州錫福無遺是鈞曼羨之祥亦及疲癯之
老三五六經之載籍初莫預於討論萬八千戶而冠軍第深慙
於勳伐言念逢辰之幸誓肩報上之心臣無任

歷官表奏卷十一終

歷官表奏卷第十二

廬陵周益國文忠公集一百三十五

邑後學歐陽榮介卿重刊

慶元元年

乞致仕表 五月一日

臣某言伏以三千同臣心甫際興王之運七十致君事適臨告
 老之年在聖時雖曰難逢顧經訓則當易退仰祈從欲俯遂乞
 身臣誠惶誠懼頓首頓首伏念臣以一介之荒遺竊四朝之榮
 遇讎書分察於羣英之後修注代言於強仕之前投閒中避於
 要權起廢晚膺於簡擢從班政地俱閱十春孤棘公圭咸躋一
 品叨塵過矣報效茫然迫於遲暮之時加以衰羸之疾內循涯

分允合歸休惟貪戀於盛明乃遷延於歲月今而年至可以情
聞已愧歐修踰六旬而得謝尙希杜衍纔一請而獲從伏望皇
帝陛下軫念孤蹤保全末路收內祠之祿秩返初服之耕桑庶
佚餘生永陶至化江滙海島任鳧雁之少多桃野華山縱馬牛
之歸放懇誠惟切察允是期今臣乞守本官致仕臣無任

不允詔

勅某省所上表乞守本官致仕事具悉宿艾之臣國家所寶
故尊事黃耆乃成福祿之盛雖無老成尙以典刑爲賢朕聞
中外之良每歎壽俊之少如卿舊德爲時宗工久位公孤正
資彌亮於四世借令期耄猶當就見於百年克壯爾猷胡謝

乃事雖不渝東山之志宜詎忘本朝之心尙體眷懷毋拘常
節所請宜不允故茲詔示想宜知悉春寒卿比平安好否遣
書指不多及

第二表

臣某言近臣以年近七十上表乞致仕伏蒙聖恩特降詔書不
允者一辭而退荷宸眷之曲留三思而行審愚衷之素定延望
雲天之施仰干鈇鉞之誅臣某中謝臣才不如人生而多病幸
會蚤塵於顯仕平居常懼於疾顛雖深止足之思未効涓埃之
報固不敢先期而引去又豈容翫歲以忘歸頃在湘中常屢形
於表奏逮移江右卽力避於旌麾旣尋香火之盟實便邱園之

計臣之此意眾所共知今者血氣益衰筋骸難強人皆憐其憔悴自亦畏於滿盈乃昧禮經猶饗廩稍辭榮壯歲居慙烈士之風戒得暮年尙佩聖人之訓伏望皇帝陛下深仁恤物大德矜愚念其持筆橐於累朝許以掛衣冠於盛世輟駒局趣本無老驥之心蓬鷗翱翔非有冥鴻之志陳情已竭得請爲期臣無任

不允詔 樓鑰撰

勅某省所再上表乞致仕事具悉七十致仕雖著於禮經二三大臣難拘於古制矧惟元老嘗冠中臺周旋兩朝負荷重事旣于蕃於南國終退處於東山神明未衰德望彌邵奉獻祠之香火自樂隱居掛神武之衣冠胡爲早計抗章再至

義愈高顧難徇於冲懷尙少安於素履所請依已降指揮不允故茲詔示想宜知悉春暄卿比平安好否遣書指不多及

第三表

臣某言近再上表陳乞引年致仕伏蒙聖慈再降詔書所請宜不允者仕而無補每負愧於初心老則告歸盍求全於末路敢期溫詔尙闕俞音庸祇竭於血誠庶必諧於素願臣某 中謝 臣聞休退者人臣之常事眷留者明主之異恩或才德出羣可備國家之用或精神尙壯未容田畝之安縱復少需固將有說如臣者最爲闕事仍迫衰殘少日邐迥不謂躡躑於臚仕半生羸瘵曾敢望於高年而乃攀聯執帛之班荏苒從心之歲僥踰

既極災疾宜侵自去夏以迄今益無時而不病形容枯槁志氣蕭條雖家事以當傳豈官榮之可冒遲回不去觀聽謂何非力謝於軒裳殆兩魯於禮法深虞隕越難避黷煩伏望皇帝陛下俯監危悰曲加鴻施無功有過恕既往之愆尤善始以終賜不貲之造化假餘齡之燕佚觀盛世之隆昌乞骸疆健之時莫追明哲擊壤寬閒之野尙答生成臣無任

謝致仕表

臣某言伏奉制命授臣少傅依前觀文殿大學士益國公致仕加食邑一千戶食實封四百戶臣已望闕祇受遙謝訖者告老叩闕屢瀆前旒之聽疏榮就第特陞左棘之聯遂止尼之私情

彭仁崇之異數雖故事無控辭之禮在愚臣重僥倖之慙臣某

中謝

臣竊考中興以來旋觀故相之籍釋禡廟堂之上殆三十

人引年祠館之中纔一二數蓋進用多由於壯歲故退休罕及

於暮年如臣者素乏才能晚叨任使坐竊無功之祿免羞有道

之貧不自意其久生乃及時而得謝仍紆皇眷申錫鴻恩昔疏

受漢之名儒居易唐之遺直皆歷儲宮之傳用為晚節之榮臣

愧非二子之賢忝正三孤之秩職崇祕殿爵極諸公初終盡出

於遭逢高厚莫勝於戴履茲蓋伏遇皇帝陛下德隆堯舜仁法

祖宗愛人每急於親賢興孝尤先於貴老誕布絲綸之渥惠綏

簪履之遺臣祇服寵光退誇族黨遂乘榆之暖餘生幸適於邛

慶元二年 臣無任

辭免冊命奏狀

右臣伏準制命除臣少傅致仕寵光過厚榮感倍深稽諸故事不敢輒具辭免已上表稱謝外惟是冊命之禮雖見任三公無敢當者况在休致之臣伏望聖慈卽賜寢免臣無任

孝宗小祥起居表

臣某言六月九日恭值孝宗哲文神武成孝皇帝小祥者重華仙御承奕賓天別殿几筵茲焉周歲臣某中慰恭惟皇帝陛下懋隆孝治允篤時思願寬念祖之懷俯答含生之望臣無任

慶元二年

賀生皇子表

臣某言伏覩降誕皇子特頒德音者泰元壽佑嫡長挺生列聖憑依三宮悅豫臣某中賀臣伏以功行積累旣存不已之誠子孫眾多斯錫無疆之祉天人合契今昔同符恭惟皇帝陛下道法祖宗化行宮壺夏家仁遂適神禹之三年周室宗彊肇文王之十子誕布龐鴻之澤丕昭蕃衍之祥臣身已歸田義當擊壤嘉與含生之眾共深賴慶之情臣無任

賀三宮冊寶禮成表

臣某言恭聞十月三日奉上壽聖隆慈備福光佑太皇太后壽成惠慈皇太后聖安壽仁太上皇帝壽仁太上皇后冊寶禮成

者九重之上逮事三宮一日之間虔敷四冊情文並舉夷夏交
欣臣某中賀恭惟皇帝陛下誠心格於上穹榮養隆於華旦奉
父母而及於王母連萬壽之徽稱自殿庭而達於內庭聳兆民
之壯觀繇堯舜禹相傳而後獲邁周漢唐既往之前聞臣幸以
餘生逢茲闡典嘉與農疇之眾永依孝治之仁臣無任

○賀韓皇后冊禮成表

臣某言伏聞十月六日皇后受冊禮成者彰內治之功久宣陰
教發外廷之冊今講繹儀月遡日以增明臣暨民而胥悅臣某
中賀恭惟皇帝陛下孝隆親養政急家齊歷選勳賢蓋自重親
之命榮加璽綬適同三殿之歡振古未聞在今創見臣已還官

○賀魏明班仰繫覆載之功實預榮懷之慶臣無任

○慰慈福上仙表

臣某言伏覩太皇太后十一月六日遺誥者變生慈福悲
動綿區臣某誠哀誠咽頓首頓首恭以天行太皇太后年開九
帙之三坤載四朝之久極北宮之榮養侍高廟之宸遊皇帝陛
下以萬乘之尊崇曾孫之孝特從蕃制昭示聖心願覽朝夕之
思垂副華夷之望臣限以退居田里不復復奔赴宮庭臣無任

慶元三年

○賀瑞慶節表

臣某言伏遇十月十九日瑞慶節者誕遇題期適上冬之愛景

慶元五年 卷十二
啟禮歲禮前半月之昌辰天開有永之年人獻無疆之頌臣某
中賀 恭惟皇帝陛下仁周夷夏德合祖宗萬邦奠枕之時治功
已著三世稱觴之慶歷代所無永居北極之尊高巍南山之壽
臣身焉歸里心則望雲莫陪漢殿之班徒效堯封之祝臣無任

謝郊祀禮成加恩表

臣某言伏奉制命以郊祀大禮慶成加臣食邑一千戶食實封
四百戶臣已望闕謝恩祇受訖者聖人饗帝阻陪左右之璋退
老明農尙益南東之畝窺絲綸之溫厚顧襁褓以光華臣某
謝 欽惟熙朝最重禋祀廣配天之澤曾不遐遺眷居里之官每
同邇列如臣無狀被寵有年氓受一廬上方行於仁政侯封萬

戶位乃極於布衣逮逢慶資之頒彌覺面顏之覩茲蓋伏遇皇
帝陛下誠通穹壤道法祖宗願迎日至之陽肇講國南之祀網
去三而施惠德及飛潛爵惟五以馭臣恩覃中外肆推餘餒加
賁朽株臣久矣伏藏缺然報稱受釐宣室想帝席之夜前賜胙
齊侯凜天威而下拜臣無任

慶元五年

謝慶禮成支賜奏狀

右臣承吉州遵奉今年八月二十六日慶禮詔書致仕文武官
七十以上依格支賜羊酒粟帛曾任大中大夫以上仍與倍賜
長吏致禮差官就賜臣已望闕祇受訖臣無任

賀生皇子表

臣某言伏睹降誕皇子特頒德音者高祿錫羨長嫡挺生列聖
儲休三宮交賀臣某中賀臣聞德如堯帝祝多子於封人聖若
文王詠百男於詩雅厥今盛事與昔同符恭惟皇帝陛下纂國
丕基受天明命當藝祖肇邦之歲暨統元更祚之春是開蒼震
之祥於赫炎圖之永臣屏居農畝遙睇闕庭胥同四表之歡仰
賴一人之慶臣無任

慰太上皇后上仙表

臣某言恭聞六月四日大行壽仁太上皇后上仙者災纏長樂
悲動嚴宸臣某誠哀誠咽頓首頓首伏以壽仁太上皇后沙麓

傳祥河洲協詠勤宣婦道誕育聖躬皇帝陛下欽念母慈備彰
誠孝宮中自行三載之制天下咸識一人之心願寬罔極之哀
永御無疆之福臣限以退伏田里不獲奔赴宮闈臣無任

慰太上皇帝上仙表

臣某言伏觀大行聖安壽仁太上皇帝遺詔者天心難測神尊
海臻甫涉夏秋兩喪考妣臣某誠哀誠痛頓首頓首臣竊以慈
懿寢園之奉馳馭將歸聖安丹鼎之成調龍胡以斷黎庶攀號而
不釋聖神慈痛以何堪恭惟皇帝陛下孝通神明德侔天地躬
大舜終身之慕每竭誠張本作每竭誠心回有唐二聖之觀張本作歡方
隆榮養迭逢變故諒極哀悰願寬銜恤之情毋爽宅憂之禮臣

退休田里阻造宮庭臣無任

壽康宮追薦疏右語

右伏以六年端尹久叨雨露之私三月宰庭未効涓塵之報雖
下機於一篋旋為帥於十連逮聞端冕以自怡亦復掛冠而歸
老茲焉奉諱久矣孤慙欲申豺獭之微誠是假龍天之仙驥太
行聖安壽仁太上皇帝伏願逍遙簡路佑皇圖從祖考在天
之靈篤子孫下地之慶

謝明堂禮成加恩表

臣某言伏奉制命加臣食邑一千戶食實封四百戶臣已望闕
祇受訖者郊天甫竣宗祀於地爰暨老臣異數寵臨餘生何幸

臣某言謝 臣竊以大封於廟叶訪于之詩爭號於庭法夫揚之
象必喜之允稱豈不澤之如臣者初乏才猷濫叨爵秩

躡羈於不能躬黍稷以未虛躬掛衣冠猶復列鶴鸞而賜胙
茲焉伏各本俱脫 甚食功此蓋伏遇皇帝陛下寅紹丕基欽
崇鉅典內極念親之孝外嚴錫類之仁推餘餒以馭臣示隆私

而篤誓則其土壤厥惟上上之田賁乃邱園奚止彘彘之帛莫
展既愆之力空懷欲報之心臣無任

慰韓皇后上仙表

臣某言伏覩進奏院報大行皇后上仙者桂輪隱耀椒掖闕儀
厚載既傾淵衷斯惻臣某誠哀誠咽頓首頓首伏以大行皇后

天資恭儉地望高華久殫婦順之勞正倚坤宜之助奄從先后莫返中闈恭惟皇帝陛下孝切亮陰恩隆儷極雖聖情之易感顧天數之難移願寬當宁之思垂副含生之望臣退居田里阻造宮庭臣無任

謝降官表

臣某言伏奉告命降授少保依前觀文殿大學士致仕臣已望闕遙謝祇受訖者告老七年宿愆故在貶官一列洪造難名所慚垂盡之時自抵怙終之罪臣某中謝伏念臣疎慵一介際遇四朝逮事高皇通籍華貴早塵臺省受知孝廟久玷機衡不思勉效於同寅乃敢與聞於異論既肺肝所共見豈口舌獨能自文惟光

宗興念於元僚分閩寄肆陛下曲憐其末路許遂里居首將正於狐邱巢忽危於燕幕狂夫妄發姓名輒及於樵蘇公論大喧黜罰盍輸於薪粢止削司徒之秩猶存平土之官茲蓋伏遇皇帝陛下洽德好生馭民敬故國皆曰殺雖微可恕之情義刑不加刑姑用惟輕之典非特匹夫之受賜是令四海之歸仁臣有愧積中無階報上省營田野視桑蔭以其幾何託命乾坤比櫟材而知免臣無任

嘉泰二年

賀太皇太后加上尊號表 十二月

臣某言恭聞加上壽成惠聖慈祐太皇太后尊號冊寶禮成者

三朝母道不彰行地之功六字號榮益顯補天之德化行宮壺
風動華夷臣某中賀恭惟皇帝陛下通駿孫謀懋隆孝治從行
慶壽續盛事於熙寧奉獻義安掩前聞於咸泰有衍玉卮之禮
無疆金母之年臣久返農疇幸逢邦慶昔長秋僮極叨視草於
制麻今廣內葳儀阻綴班於孤棘永言抃蹈實倍常均臣無任
辭免復少傅狀

少保觀文殿大學士致仕益國公周某狀十二月十八日巳時
准尙書省遞到劄子十二月九日奉聖旨周某畱正並特與復
元官致仕伏念某叨踰滋久罪戾實深比致人言祇從輕典仰
銜天施方省前愆雖歷歲時未經赦宥敢圖洪造驟洗丹書俯

伏以思兢惶併集謹附元遞筒回申尙書省乞賜敷奏且令依
見存官致仕庶安孤迹以保餘生伏候指揮閏十二月二日三
省同奉聖旨不允

令學士
院降詔

不允詔

勅某省三省進呈卿狀辭免特復元官致仕恩命事具悉卿
蚤司鈞軸峻躋朝棘之班已掛衣冠久遂家山之佚比騫華
秩姑塞嘖言全節高明卿久著四方耆碩之望茂恩優禮朕
思崇三朝魁舊之賢亟復故官爰頒新渥宜祇成渙胡事謙
辭所辭宜不允故茲詔示想宜知悉冬寒卿比平安好否遣
書指不多及

賀立楊皇后表

閏十二月

臣某言恭親進奏院報降制立皇后者二儀奠位協成覆載之功兩曜宣精丕顯照臨之象盛典朝敷於宮掖歡聲夕徧於海隅臣某中賀恭惟皇帝陛下德本身修化刑內治正中宮之御禮可已乎承大母之顏養之至者粲是星妃之首儷於天極之尊既表正於婦儀亦述宣於陰教臣里居歲久邦慶時逢言如絲綸竦聽郵傳之命孤執皮帛阻隨仗入之班徒與黔黎胥同鼓舞臣無任

嘉泰三年

謝復少傅表

臣某言近蒙聖恩復臣少傅致仕尋具辭免伏準詔書不允已於正月六日祇受制命望闕謝恩訖者閱呂刑之實周典素輕還疏傅之官漢恩彌重丹書洗滌皓首兢榮臣某中謝伏念臣坎壈孤蹤摧頽暮景冒寵光而最久積罪戾以殊深比致煩言分甘嚴譴獨賴聖神之眷許存孤保之官僅閱再朞未經三省駭新綸之驟下恍舊秩之口來茲蓋伏遇皇帝陛下徧覆無殊容光必照刑非樂用汝自速辜恩弗遐遺予無作好誕布發生之德俯加老退之臣大誠薄懲昔忝小人之福初迷後順今瞻君子之行惟誓糜捐以圖報稱臣無任

賀瑞慶節表

唐書卷一百一十五
十一
伏以迎上元之甲子寶麻方昌占南極之丙丁壽星有爛標十月爲陽之節肇一人有慶之期臣某中賀恭惟皇帝陛下誕聖繼天施仁發政十年生聚俯同越國之時百世本支遠邁周王之壽凡居有截共祝無疆臣身處山林歡均朝野雖弗及羽毛之衆羣舞百於虞廷豈不如土石之頑助呼三於漢嶽臣無任

嘉泰四年

謝郊祀禮成加恩表

臣某言伏奉制命以郊祀大禮慶成加臣食邑一千戶食實封四百戶臣已望闕遙謝祇受訖者祀以一純二精格三靈之景貺德徧羣黎百姓洽四表之歡心霈然滂漉之恩惠此疲癯之

老臣某

中謝

伏念臣蚤持薄技久覲盛儀玉輅安行嘗預執綬

之選金鑿倬直屢裁肆肯之書歷二府之弼諧導一人之陽恪晚安新政歸老故鄉舜樂九成已斷鈞天之夢漢封萬戶猶披輿地之圖榮幸則多事勞何有茲蓋伏遇皇帝陛下功繩祖武德契天心清廟口郊浮霽光於曉日紫壇奠幣翔協氣於層霄斂福孔多均釐滋廣臣猥叨邦養增耀里居錫之山川土田敢虛霑於帝澤與爾鄰里鄉黨期共戴於君仁臣無任

賀瑞慶節表

伏以冬候燕溫儲祥甲觀天光絢爛載誕聖君溥海春回歡聲雷動中賀恭惟皇帝陛下齊休天地冠德帝王共北辰之星常

居其所如南山之壽無不或承念昔三五之時野多八十之老
臣今何幸年適與同播擊壤之謠豈知帝力陋守封之請但罄
祝詞臣無任

歷官表奏卷十二終